

111 年全國語文競賽客家語朗讀文章高中學生組（四縣腔）

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板仔在該激啊激欸¹。無人出入咁个魚市場裡肚，就單淨留等，幾葩仔²孤栖个電火，還過，幾臺仔摧啊摧欸³个抽風機。

魚市場外背闊闊个停車場這片，犖花犖花仔⁴停等幾臺个自用仔。還毋想睡个駛車仔人，有人帶等罐頭來餵流浪狗，也有人帶等釣槓仔來湊月光釣魚仔。魚市場該片遠遠个停車場邊脣，幾下个越夜越有元氣个後生人，載等掛有大喇叭个音響，同車後斗撒向天、三臺車仔比比企，在該咚滋咚滋⁵尋月光共下跳舞。

右手片个音樂聲撓到吾腳底癢癢，毋過，左手片騎等過个兩臺奧多拜，錫著吾个目光。佢跔等佢兜个身影，行上兩百八十公尺長个笨鯊橋，想去看啊，掛等頭燈个兩個網魚人，係愛網麼个魚仔？月光也勾頭出來咁，一浪一浪仔个水紋，在月光下看到清

清楚楚，一張魚網、兩個網魚人，落網、收網，撈起來个係一網个月光。雖然，連魚屎仔都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个河壩水，也認同吾个想法「係啊，係啊！」緊應緊大聲，佢緊聽緊生趣。毋過，同佢看真來，該「係啊，係啊！」个聲說，怕係河壩水分海浪打轉來，抑係海浪激上河壩水个聲啊！

毋多知仔，就分佢行過笨鯊橋咁。橋這片，日時頭分人箭到轂轂个自行車，這下通棚一列列仔企好、企正，在月光下恬靜。光華華个路燈下，無人上下咁，就單淨看著一隻揸等螺殼个毛蟹，對白沙堆勾頭出來又囡倒轉去，對路脣趟過來又趟倒轉去，自家在月光下搞囡人尋。佢企在路脣，看毛蟹、看流流流流个河壩水，在共樣个月光下，已像分佢看著咁，頭擺，該一大陣笨鯊入港時，客家打漁人佢兜面項个笑容。

¹ 激啊激欸：音 gieb a gieb e`；液體來回晃動貌。

² 幾葩仔：音 gi` pa` e`；幾盞。

³ 摧啊摧欸：音 kog a kog e`；此為形容機器轉動的聲音和狀態。

⁴ 犖花犖花仔：音 lo fa` lo fa` e`；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

編號 2 號

【夜鷹¹】邱一帆原作

毋記得在哪時起勢，佢輒常對斷烏²，聽著天頂高「追佢啊追佢，追佢啊追佢」个聲，一聲又一聲，一直對半夜喊到天光，該刺耳吵人个叫聲，正會對吾个耳公肚消失。當多年前，佢第一擺在屋下聽著該恁精恁嘎个聲，實在當佇毋著，趑趑行出屋面前去看。該烏烏像細雞子个身影，在天頂高飛啊飛欸、迂啊迂欸³。有成時，毋知係飛到瘰地，抑係麼个，會頓腳在屋頂高，灰濛濛个烏身，「追佢啊追佢，追佢啊追佢」个聲，還係一聲喊過又一聲。

該係麼个鳥？聲哨仰會恁吵人？佢遽遽走轉屋肚去，當認真上網路項去尋資料，尋上尋下，正發現該種形投个鳥仔，名就安到夜鷹。恁起來試著當奇怪！早早在 1861 年就有人在臺南發現佢个影跡，離這下有一百五、六十年地，既經算係臺灣特有亞種个鳥仔，對山頂到平洋、對莊下到都市，一哪仔都看得著佢个身

影、聽得著佢个叫聲。做麼个佢食地四十大零歲，正第一擺在南庄聽著、注意著恁樣个鳥聲、知著恁樣个鳥名呢？佢試著自家已敗勢啊！敗勢自家無好好个認識，一直生活在自家身邊个鳥仔。

逐年新曆二月到八月，係臺灣夜鷹尋伴个繁殖期。七個月恁長个時間，逐隻鳥公就想愛尋著自家理想个對象——鳥嫲，互相培養感情，相好下一代。乜一直愛等到孵生後代，細鳥仔會飛、離開鳥公鳥嫲个保護，正算完成傳宗接代个使命。故所，在這期間，鳥公對入夜到天光，會緊喊出「追佢啊追佢，追佢啊追佢」這吵死人个聲骸，來宣示領域，嚇走其他可能个入侵者。也因為夜鷹个聲哨難聽又大聲，有當多愛恬靜驚吵个人，就恁樣分夜鷹吵到睡毋得，諗到望毋得夜鷹遽遽消失忒！

佢知夜鷹个聲哨當吵，吵到人食睡就毋得，尋伴个繁殖期間，確實影響著人个生活。毋過，夜鷹毋係無一坵好，佢對環境也有一定个平衡⁴作用。夜鷹个嘴擘到又闊又利，會用來搶食蟲仔，不管係在暗暗个天頂高抑係光光个路燈下，水蟻仔、金龜仔、草蟻仔還有當多蟲仔，就係厥个食物、厥个好味緒。因爭夜鷹个捕食習慣，多多少少也維持咧該兜蟲仔个數量，保護著生態个平衡。

¹ 夜鷹：音 ia en'；臺灣夜鷹屬於夜鷹目、夜鷹科，非保育類特有亞種，別名：南亞夜鷹、林夜鷹、疏林夜鷹、石磯仔。

² 斷烏：音 ton' vu'；入夜。

³ 迂啊迂欸：音 din' a din' e'；轉啊轉。

⁴ 平衡：音 pin' fen'；指一個物體的運動維持不變（亦即沒有加速或減速）的狀態。

111 年全國語文競賽客家語朗讀文章高中學生組（四縣腔）

編號 3 號

【芋荷葉个智慧】謝錦綉原作

這幾年長透會在報紙、電視新聞看著，魚仔肚屎留等各種个塑膠絡仔。

現下因為塑膠絡仔便宜又利便，毋管燒个、冷个、冰个，總下用塑膠絡仔裝，無論上山下海，大隻細隻，用過就挑忒¹，大家慣勢恁樣無限制个使用塑膠絡仔。

三不二時看著新聞報導，海鰵死在海脣，研究人員切開厥肚屎，發現海鰵毋係發病死个，係因為食忒多人類擲在大海裡肚个塑膠絡仔，佢無法度消化正死忒个。海鰵歸身仔塑膠粒仔个毒性，其他个海魚乜共樣有，人又捉魚仔來食，這毒性又轉到人類本身來。結果就恁樣輪迴，魚仔源頭減少，大環境污染，人類自家乜係大食物鏈其中之一，健康當然大受影響。

今年正月年過忒，佢對嘉義上來臺北寮一兩個月；吾姊戴新店山頂，有所在好種菜，逐擺有菜好摘，佢就坐車仔拿來分佢。

第一擺拿著佢用紙絡仔裝等个青菜，佢先放冰箱，等到愛煮个時節，正打開紙絡仔來看，啊哦！正知紙絡仔裡肚還用三層芋

荷葉包等，毋係用塑膠絡仔袋。佢就想：「阿姊啊，你正經跔毋著時代咧！這下還有麼儕用芋荷葉包東西？」佢暗暗在該笑阿姊。

無想著，先拿出一種菜食，旨食个菜用原本个芋荷葉包轉去，繼續放冰箱。過兩日菜食忒，去拿第二種菜个時節，打開芋荷葉，包在葉肚个青菜，還本本萋萋！到這下，佢正知芋荷葉恁好用。

這下个時勢，科技進步盡遽，大部分人總係認為新个發明較進步，舊換新，舊東西大家就挑忒。

毋過，毋管新抑舊，大家總愛想較長久、想較遠兜仔，該兜毋會綿、毋會歿个垃圾，緊留緊多，留到最尾，地球總會分垃圾搵忒²；到該央時，人無法度戴地球，後代子孫乜毋知愛歇在哪位正好？

芋荷葉毋單淨做得保存青菜、魚仔、肉，效果乜比塑膠絡仔較好。東西食忒，摻芋荷葉挑忒，佢轉到泥肚，自然綿忒，就會變做肥料養分，全無打爽。芋荷葉無毒性，毋會污染環境，顛倒分地球淨俐，分人類康健，這係頭擺人个智慧，愛記得正好。

¹ 挑忒：音 tiau` ted`；淘汰、丟棄。

² 搵忒：音 eb` ted`；掩埋、埋藏。

111 年全國語文競賽客家語朗讀文章高中學生組（四縣腔）

編號 4 號

【老鼠仔】張捷明原作

老鼠仔有當多種：田鼠、透地鼠、錢鼠、大老鼠、細老鼠……，田鼠在田坵肚絡食，盡好食番薯，當大隻、又有肉，係頭擺人無豬肉食該下，當重要个肉氣來源之一。

再講透地鼠，佢歇在地泥下，盡好打窿，蒔田个水田，在收冬該下種番薯雜作，係有透地鼠，等到交春蒔田，田脣輒常會漏水，穩水田嘎變漏水田。山田个田坎較高，還會慢慢仔崩田坎，就係老古人講个：「大漏漏毋長，細漏漏燥塘。」意思係講，山魚塘係有老鼠窿，大窿漏大水，會緊張，再仰般無閒，乜會跔等抽間去塞起來，毋過，細窿漏細水，無閒个耕種人就會想，一息息仔定定，就無抽無間，想講天光日正來補，結果天光日又毋記得，等到想著，魚塘水早就就燥忒咧。

田鼠會爽番薯，人就捉老鼠仔食，算係一報還一報打平過。透地鼠當得人惱，毋過，做得分人想著這句老古人言教子孫，乜算佢還有兜功勞。

另外，還有錢鼠仔，錢鼠仔實在就得人惱，歇在人屋下个圳溝肚、烏疏疏个所在，細細隻無幾兩肉，還一身臭臊拖蟹，係現

代阿姆人盡驚个小動物。毋過，大人乜當生趣，偏偏同佢安名錢鼠仔，怕係講，這家人當有錢，穀倉正會有當多穀分錢鼠仔食，好得人類知好畜貓仔打老鼠，係無，金山銀山就會分佢食空。

毋過，這下天年倒貶，除忒田鼠、透地鼠、錢鼠，還加一種寵物鼠¹。寵物鼠無天敵，連貓仔就毋係佢个對手；今个人畜个貓仔，嘎毋敢打老鼠仔，還較毋敢打寵物鼠，在人个屋下，一片畜老鼠仔服侍佢做阿公，一片又試著對貓仔過意毋得，故所乜用飼料畜貓仔做寵物，毋單淨毋使寵物貓打老鼠，還同老鼠仔放共下，表示貓鼠世紀大和解，人類第一功。毋過，麼人會知貓仔係仰般想个呢？

二十世紀後，除忒寵物鼠，世界又加一種還較新品種个老鼠仔，毋使飼料，毋會屙屎，淨淨俐俐又毋會喬人，日日放在手巴掌惜日惜夜，還做得分人使嘴，佢安到滑鼠。手巴掌捉等厥圓身在桌頂一滑，手指在厥一片耳公一點，就做得指揮電腦，指揮世界，指揮地球，難怪十二生肖，老鼠仔早就打第一，貓仔嘎紙頭無名、紙尾無姓，連同老鼠仔比大細个資格就無。

¹ 寵物鼠：音 cung` vud cu`；人類為了觀賞或趣味而飼養的鼠類。

111 年全國語文競賽客家語朗讀文章高中學生組（四縣腔）

編號 5 號

【阿婆个烏鷄】曾菁怡原作

戴莊下樹多、田多、鳥仔多，天時好打早就做得看著電線頂高俚共下像盲睡醒个斑鳩仔，抑係歸群仔嘍嘍嘎嘎在路脣絡食个屋簷鳥，有成時還看得著在天頂飛來飛去个鷄婆。有一種鳥仔歸身个毛烏疏疏，淨在翼胛尾摺烏尾有一息息仔白毛，目珠、觜同該瘦夾夾个腳係黃色个，安到烏鷄。佢總係跳啊跳欸、跳啊跳欸，毋多知仔就帶佢跳入有吾婆个回憶裡肚。

阿婆係篤實个莊下婦人家，溫和恬靜，為著家庭一生人就像掙掙轉个極樂仔樣仔無時間。天盲光就跣床炆豬菜分豬仔食；天矇光就揸等衫褲去河壩脣洗衫；衫褲晾好又過趕緊去菜園落肥、淋水。除忒這兜，還愛煮三餐、畜頭牲、做田事……。下晝頭該下阿婆正有好歇暍，佢盡愛坐在門口个藤椅頂高，目絲絲仔享受微風吹在面項个鬆爽。

有一日下晝，阿婆正坐啊下來準備歇暍，目珠影著外背个竹筴仔下有一團烏疏疏个東西在該停動，行兼過去看，發現係一隻還毋會飛个烏鷄鳥子。阿婆摺佢捉在手項，從頭看到尾，從尾看到腳。一下揸啊厥頭那頂摺面頰卵，一下掀開厥幼嫩个翼胛，搵

過來搵過去，像細人仔抓著生趣个搞个，看到眼晶晶仔無轉目。

阿婆想起閒間仔有一隻頭擺阿叔畜鷄哥个鳥籠仔，就決定摺這隻鳥子畜起來咧。逐朝晨，阿婆手面洗好就去看籠仔裡肚个飼料還有無？愛過添水無？一有閒就摺鳥籠仔拚到淨俐淨俐。食飽晝，阿婆就會摺藤椅徙到籠仔脣，俚等籠仔教烏鷄講話：「天光哩！」、「食飽盲？」、「大家好！」、「正來奈」……。日見日，該烏鷄看著人也會講阿婆教佢个話哩。

無想著，有一日朝晨籠仔門毋知仰般分人打開欸，裡肚个烏鷄也毋知走去哪位？阿婆兩隻手兜等飼料，頭磬磬仔企在籠仔脣，久久正接受烏鷄毋見忒个事實，喃喃喃喃講：「恁打爽，畜欸恁久！」該隻鳥籠仔又收入去閒間肚囤也。

這禮拜日阿婆做對年，阿姆吩咐愛轉老屋祭拜。燒金該下，幾下隻烏鷄在竹頭下跳啊跳欸、跳啊跳欸，不時臥頭這看該看，背尾就飛到竹林裡肚，淨伸涼風吹過竹葉悉悉疏疏个聲。毋知阿婆這下，有做得同佢講話个烏鷄無？

111 年全國語文競賽客家語朗讀文章高中學生組（四縣腔）

編號 6 號

【網出阿姆个背影】徐熏琪原作

網路就像係一面洋洋洋洋無邊無脣个大海，網等人同人之間个距離、網等世界个脈動、網等日常生活。佢，就像係一尾魚仔，輒常洄入網肚遊遊野野，緊洄緊深、緊洄嘎緊遠……。

還記得讀國中愛開學个前幾日，阿姆拿等一支手機仔講愛分佢用。頭下碼，佢疑狐自家个耳公係毋係有聽差，緊擦等手機仔，歡喜到奈毋得，心肝肚恗想，佢總算乜有一支手機仔哩！正想講愛仰般好好來使用這手機該下，就聽著阿姆講：「分你手機仔，係方便你摺屋下人聯絡事情哦！毋係分你拿來變鬼變怪个，也升國中哩，自家愛曉得自重，敢做得到？」佢踈等點頭講：「阿姆放心啦！佢用手机仔定著會有準則。」

續等幾下日，手機仔裡肚三不二時就跳出遊戲、社交軟體个訊息，「阿姆放心啦！佢用手机仔定著會有準則。」這句話早就變成一陣風，飛到天背遠去哩！

網路世界切斷阿姆摺佢之間个信任，毋多知仔同屋下人講話个時間緊來緊短，同手機仔相處个時間越來越長；搵手做家务个時間緊來緊少，洄落手機个時間越來越多，佢就像今這下个低頭

族共樣，一旦手機仔拿在手頂，愛放下來係無恁該个事情。

記得有一日食飽夜過後，佢堵好摺同學搞等緊張刺激个線上遊戲，阿姆喊佢好去洗碗筷也，佢詐意仔無聽著，過無幾久阿姆又過喊加一擺，佢就謹等應講：「大細心！逐擺就喊佢！屋下淨伸佢一儕人喲？」無想著這句話深深刺入阿姆个心。阿姆聽著過後，就恬恬行入灶下去洗碗。佢看著阿姆洗碗个背影，感覺著頭下對阿姆堵堵撐撐¹ 蕪然過分，就遽遽放下手機仔同阿姆會失禮，摺阿姆手頂个碗筷接來洗。

該暗晡為著這件事情睡毋落覺，腦膈肚浮出阿姆洗碗个背影，該背影就像係一面鏡仔，照等阿姆腰拈背吊个身影，嘎映出佢無坎無像个態度；照等阿姆對佢个開容笑面，嘎映出佢對阿姆眼矇矇仔个面目。更深夜靜，佢个反省比夜還較長，經過這擺个事件，正意識著佢个日常生活既經分網路世界縹緲，漸漸仔疏離對屋下人个互動。故所，佢想尋轉阿姆對佢个信任，愛自我要求正確來使用手機仔，學校作業定著愛先做忒、家务搵手做忒過後正使用手機仔，還愛記得同屋下人多共下，大家和和接接過日仔該正係盡有溫情个家庭生活。

¹ 堵堵撐撐：音 duˋ duˋ cang cang；頂嘴。

【採筍蟲】郭亭好原作

還細時節，爺哀為著愛畜僱兜這陣大細，歸日仔無閒到躁躁轉，屋下輒常伸著僱兜這幾個細嘍仔，長間搞到癢咧，毋係伏在長凳板頂睡，就係在戶檻下睡到四腳惹天。天生天養，該係僱識行過个童年。

等阿哥較大咧，佢會帶僱兜滿田滿畝去拈揚尾仔、打草蟻、摘土扒仔、土番樣這兜來食。該時節，屋背有種一大墩个烏葉竹，上筍¹个竹仔暴芽就會有竹筍蛄在筍尾生卵；搞怪个阿哥會帶僱兜去捉竹筍蛄來搞。阿哥捉竹筍蛄个本等一等慶，佢講愛細義毋好打醒竹筍蛄，看佢脆力脆力一下仔就同佢掙²下來，畀看著个竹筍蛄無一隻走得掣。佢同捉來个竹筍蛄用棉線縲核放佢飛，僱兜踅等竹筍蛄走，該線仔一下長一下短，像放紙鷂仔樣仔，等僱兜搞懶咧正同線仔散開放佢走。

一擺阿哥嘴豺，帶僱兜去尋上筍地正綻个葉仔就黃忒个嫩竹，阿哥講有竹筍蛄在該位生卵，裡肚會有筍蟲好拈。看阿哥大

力摠該葉仔黃忒个嫩竹，分佢倒拗下來，正經就看著筍蟲蠕蠕動，僱兜遽遽跔落去搨拈。轉到屋下，阿哥就將筍蟲放落鑊肚用油煎，僱兜企在灶頭脣脰有嘍仔³等，看等該煎到香香赤赤个筍蟲，口涎水強強就會跌下來！毋過，一儕正做得分著幾尾仔筍蟲定定，僱同老弟三兩口就嘍淨淨咧！阿哥看著，遽遽過同厥碗肚个筍蟲分分僱兩儕食過願。該當時，阿哥恁肯分僱兜食，僱兜噯無感念阿哥惜僱兜个情意，淨知好顧嘴空定定，這下恹起來對阿哥實在當敗勢。

有一日，隔壁个阿姨來分阿姆請食晝，番綻个阿哥知阿姨毋敢食筍蟲，就挑挑搨射佢，同煎好个筍蟲擲入阿姆正煎好个魚肚，阿姨恹著係魚卵煞猛食，還緊阿腦講恁好食。尾下老弟無細義噯講出來，害阿姨從入⁴便所肚翻到噁噁滾，該日阿哥就分阿姆扭等耳公去同阿姨會失禮，還分阿爸罰去阿公婆牌前跪歸下晝。

這下恹起還細時節，雖然無像現下人生活恁豐湧，毋過日仔過來當自在，當多該央時好搞个齣事，一息仔都毋會輸這下細人个網路遊戲，僱兜在該田坵仔、山排走相逐个腳跡，還深深印在吾腦膈肚，係盡生趣个回憶。

¹ 上筍：音 song' gong'；竹筍太慢採收而老化成竹子。

² 掙：音 dui'；指用力拉扯。。

³ 脣有嘍仔：音 goi' iog' iog' e'；因為想吃，而流口水的樣子。

⁴ 從入：音 zung' ngib；快速衝入。

111 年全國語文競賽客家語朗讀文章高中學生組（四縣腔）

編號 8 號

【花樹下个童年】李宜諭原作

美濃永安老街在美濃河个北片，歸條永安路對東門樓到德勝伯公壇，分做上莊、中莊、下莊，吾屋下歇个「花樹下」，係前莊，這位有南柵門渡船口，係永安老街最鬧熱个地方。

花樹下深深刻印等吾个童年。吾姆民國 49 年嫁來美濃，就在美濃國小教書，還記得，總會看著佢在操場項教大會舞、在禮堂教民俗舞，還有扇仔舞、筷仔舞、彩帶舞。佢人緣好、手腳流掠，鄰舍个細妹仔、婦人家都會送佢剪伸个布仔，佢就會拿來做當靚个衫褲分佢兜著，故所，佢兜恁多姊妹小學个學生帽、制服、洋裝、裙、褲，大概都係阿姆做个。

吾爸也係先生，佢會帶佢兜做搞个，像：雞毛燕仔、銅笏仔車、竹蟬仔、竹揚尾、竹筒打高腳、紙鷗仔這兜。該年代，係歸伙房人大家共下用一個便所，便所下背係糞缸，看著恁深个糞窖，佢就會頭那昏昏驚種下去¹，故所毋敢入去，阿爸就逐朝晨載佢兜幾個細姪仔去學校上便所，一儕人一間，屙好就遽遽轉屋。

吾入學前，佢膠大老妹都係跔阿哥出去寮，去河壩脣灌土狗仔、搞園人尋，去田坵仔釣蚬仔、去河壩肚捉大肚魚。坐在美濃

舊橋頂項看河壩，在伙房裡背竄上竄下²，去阿婆个河壩埔菜園搞寮，蹶在鄰舍个圍牆頂搞捉人个，搵到鄰舍譴著，放狗仔出來逐佢兜，佢兜就恁樣，練會咧蹶圍牆³个真工夫。

寒天過啊忒，美濃河還無麼个水，舊曆二月二伯公生會「做大戲」，係美濃一年一擺做鬧熱个時節，所有嫁去外地个阿姑、阿姨、姨婆、姑婆都會轉來永安老街在親戚屋下歇幾下日，就係愛「看大戏」。在南柵門渡船口个河壩脣，會搭當大个戲棚，戲棚下係佢兜搞寮个好所在，一陣細人仔也會偷偷仔走去舞臺後背偷看佢兜化妝換衫褲。

開始做戲也，除忒頭前幾排个老人家坐等看以外，其他人都係企等看，有兜人還會企在凳仔項，細人仔根本看毋著，阿爸就會同佢兜擎在肩頭項，分佢兜看一下仔過願。毋過，因為看毋識也聽毋識，阿爸就會拿幾角銀仔分佢兜去買食，賣打煙腸、糖梨仔、玻璃珠汽水个攤仔，生理一等好。吾姑个屋下就歇在河壩脣，姑婆、姨婆摺阿婆就會坐在阿姑屋後背，愛下去河壩該位个墩仔項看戲，佢想，佢兜應該都係用聽个！「看鬧熱」，順續仔共下「打嘴鼓」。

日視日，年視年，日仔就恁樣過忒，佢兜也恁樣定定仔大也。

¹ 種下去：音 zung ha' hi；栽下去。

² 竄上竄下：音 con song' con ha'；穿來穿去。

³ 圍牆：音 tu' xiong'；圍牆。

111 年全國語文競賽客家語朗讀文章高中學生組（四縣腔）

編號 9 號

【舉重仙女】蔡承軒原作

阿美生來拗蠻靚，親像仙女下凡。

厥爸盡驚阿美在路項堵著惡人無結煞，就尋健身教練來訓練阿美。一開始恁著阿美會反抗，無想著阿美上課過後嘎中意去練舉重。後來，阿美一下課，毋係在健身房就係去健身房个路項。

阿美進步當遽，擎个重量也緊來緊重。雖然會試著已食力、已辛苦，毋過佢看著自家个進步就感覺著當值。有時節練到歸身仔瘦軟痛，也當想愛推懶；有時節無細義著傷，也會想愛放棄。逐擺阿美愛放棄該下，就會恸著有人講過：「危險係真實存在个，毋過愛驚佢無？係若个選擇。」在訓練个過程裡肚，佢了解，愛看著山頂項該恁靚个光景，定著無恁該。

一矚目，過地幾下年。這下舉重對阿美來講就像啟氣樣仔恁自然，佢想愛做一個舉重運動員，同鍛鍊身體个觀念傳揚分較多人知。教練試著分阿美參加比賽个時機到地，阿美無分大家失望，在頭一擺比賽就得獎。佢嘎一息仔自滿都無，因為阿美有還較大个目標，該就係愛參加奧運。

逐日訓練過後，教練都會陪等阿美共下看優秀選手个影片，

檢查自家還有哪愛改進个。阿美也陸陸續續去參加比賽，漸漸仔有緊來緊多人識佢，外背个人同佢起一個名仔，安到「舉重仙女」。

經過千辛萬苦，阿美總算得著代表臺灣參加奧運个機會，這係佢恁多年來个夢想，毋過時間當急，佢跔等就加強訓練，想愛拿出最好个表現為國家爭光。

在恁多湛斗人才个奧運場項，無半儕知阿美係麼人，甚至於還有兜仔藐視這個頭一擺來參賽个黃皮膚个細妹仔，毋過阿美知佢眼時愛做个就係拿出最好个表現，毋使聽人狗呷烏蠅，正經強个人係用成績來講話个。跔等比賽个進行，就算阿美个分數一時間跔毋著人，佢還係煞猛牯齧等牙根毋放棄。盡遽，就來到最尾一關个挺直擎¹地，教練同阿美參詳過後打算盡命牯去拚，分佢去試擎毋識擎過个重量，係講成功地，阿美就會係這屆奧運个金牌得主。

包尾十分無採，阿美落鼓²地。佢顛倒毋會試著見笑，因為佢知就算落鼓地，總比無試過正來後悔還較甘願。阿美發誓，四年過後愛重新轉到奧運个比賽場項，來同臺灣爭取一坵金牌！

¹ 挺直擎：音 ten` ciid kia`；挺舉。

² 落鼓：音 log gu`；指失敗。

111 年全國語文競賽客家語朗讀文章高中學生組（四縣腔）

編號 10 號

【燿窯仔】劉玉蕉原作

打早，就聽著阿婆吩咐阿姆，去市場割兜仔豬肉、買兜仔薯魚轉來，「欸，恁古怪！有麼人做生日係無？」問過阿婆正知，係滿姑愛轉妹家，怪毋得阿婆恁歡喜！探著滿姑轉來個時間，佢走去莊頭阿惜姨個雜貨店等，佢頭勾勾仔緊眺望。姑丈個車仔盲駛兼，佢就走出去攞手哩，姑丈車仔一頓恬，佢就蹶上車，滿姑笑等講：「屎脰盲坐燒，就愛下車吔，恁大閒情！」知佢歡喜，佢尖入車肚就同姑表姊妹仔大聲搞起來。

滿姑帶個等路已錫人，逐儕都有一份以外，車後斗還有一大布袋個番薯，阿婆講：「番薯恁多仰結煞，無就來燿窯仔好啦，屋背田項個泥，上禮拜正翻過，大體怕燥哩，佢來燿窯仔，愛無？」「好哦！讚啦！」聽著有好搞，佢這兜黏時就應好。

起窯哩啲，阿爸拗三砵大泥團做門，窯身就尋像厥拳頭嫲恁大個泥砵來結，疊高吔還過愛慢慢收兼來，幾下到，結到半爛爍又屙下來，「唉，老刀嫲無鋼哩，無恁該啣¹哦！」臨尾還勞攪阿姑丈搵手，正順勢搵好。窯一起好，阿哥就發號命令哩，佢喊佢

摻姑表姊妹去撿樵草，阿姊負責起火、架樵，大姊當分人倚恃得，火畀掌到猛猛猛，紅紅個火舌對泥砵縫項鑽出來，像愛食忒人樣仔，害佢這兜閃到遠遠遠，無幾久，泥砵就像甜柿恁仔紅啲啲哩！

「好勢哩啲，樵莫過架，火退出來，就做得擲番薯入去哩！」阿婆恁仔講。火炭掙²開來，番薯就一粒一粒擲入窯裡肚去。「哇！」表阿哥個擔竿一拓落去，紅紅個泥砵跔等屙下來，堵好奔在番薯面項，「建設難，破壞容易」，細人仔輪等拓泥砵，逐個都搵到一頭一面，背尾還係姑丈來收尾，佢同幼泥掖上去，再用砂耙頓畀搽，上背還插一支香，恁仔一息煙都無出，正喊佢兜去搞。真無簡單結起來個窯，這下看起來就像一個番薯壟呢！

因人尋盲搞罅，遠遠就鼻著香味哩，影著阿姆在該開窯，佢這兜遽遽佷近去看佢變奇術，阿姆驚怕番薯摟綿忒，細心細意在該慢慢仔挖，定定仔摟，香氣錫到佢這兜口涎溶溶跌，肚屎乜嘍哩咕嚕緊抗議。田脣項，佢兜比比坐，香香個番薯塞歸嘴仔。天恁清，番薯恁香，在屋背個田項，佢兜搞到斷烏正轉屋。

¹ 啣：音 sa；大口吃、快速吸入。

² 掙：音 boi'；推開、撥開。